

Pravilnik o kontinuiranoj profesionalnoj edukaciji lica iz računovodstvene profesije

(pročišćeni tekst)

I- U V O D

Član 1.

Ovaj Pravilnik uređuje materiju iz oblasti kontinuirane profesionalne edukacije lica iz računovodstvene profesije.

II- ZNAČENJE POJEDINIH POJMOVA

Član 2.

Pojmovi koji se koriste u ovom Pravilniku imaju slijedeće značenje:

Kontinuirana profesionalna edukacija - proces obnavljanja, proširivanja i osavremenjivanja stručnih znanja u računovodstvenoj profesiji u skladu sa zakonima o računovodstvu i reviziji Bosne i Hercegovine, i Federacije Bosne i Hercegovine, Pravilima IFAC-a, smjernicama UNCTAD-a i MOS-ovima.

Računovodstvo - informacioni sistem koji procjenjuje, obrađuje i saopćava finansijske informacije o pravnom licu;

Knjigovodstvo - evidentiranje, klasificiranje i sumiranje poslovnih transakcija pravnog lica i čuvanje originalne poslovne dokumentacije koja pruža dokaze o ovim transakcijama;

Računovodstvena profesija - profesija koja pruža računovodstvene revizorske i srodne usluge u Federaciji Bosne i Hercegovine;

Certifikat - pismena isprava , kojom Savez računovođa, revizora i finansijskih radnika Federacije Bosne i Hercegovine ,kao priznato profesionalno tijelo shodno odredbama člana 16. stav 4. Zakona o računovodstvu i reviziji Federacije Bosne i Hercegovine, potvrđuje da je lice kome je dodijeljen položilo stručni ispit pred Komisijom Savez

Licenca - javni dokument koji predstavlja dozvolu za rad u računovodstvenoj profesiji. Licenca se izdaje na određeno vrijeme i produžetak licence zavisi od poštivanja pravila profesionalnog tijela, a posebno od zadovoljavanja uvjeta kontinuirane profesionalne edukacije.

III- KONTINUIRANA PROFESIONALNA EDUKACIJA

Član 3.

Svako lice iz računovodstvene profesije dužno je da realizira - pohađa kontinuirano profesionalno obrazovanje u okviru kriterija koje utvrdi Komisija za računovodstvo i reviziju BiH , a na osnovu ovog Pravilnika. U Program kontinuirane profesionalne edukacije ulaze samo oni oblici edukacije (seminari, savjetovanja, simpoziji i dr.) koji su previđeni godišnjim programom edukacije Saveza i kao takvi priznati od strane Upravnog odbora Saveza. Kontinuirana profesionalna edukacija se obavlja kao samostalno obrazovanje (individualna edukacija) i organizovana edukacija - prisustvovanjem seminarima, simpozijima i drugim vidovima edukacije. Sva lica iz računovodstvene profesije su dužna ispuniti kriterij profesionalne edukacije u trajanju od najmanje 40 časova godišnje.

Član 4.

Samostalno obrazovanje (individualna edukacija) se obavlja tako da član profesije prati stručnu literaturu po osnovu koje će proširi i unaprijediti svoja znanja u struci a koje Upravni odbor Saveza prihvati kao stručnu literaturu za svaku poslovnu godinu. Profesionalna znanja se potvrđuju i objavljivanjem tekstova u stručnim publikacijama koje se za stručne časopise utvrđuju na osnovu posebne odluke Upravnog odbora o indeksaciji stručnih časopisa, a za stručne knjige na osnovu stručne recenzije. Organizovana edukacija se kvantifikuje brojem sati za svaku organizacionu formu na kojima je kandidat prisustvovao, a koju je prihvatio Upravni odbor Saveza.

Član 5.

Program kontinuirane profesionalne edukacije se dijeli na: **Opći dio i Specijalistički dio.**

Opći dio kontinuirane profesionalne edukacije se sastoji od:

- seminari za godišnji obračun - do 10 sati
- seminari za polugodišnji obračun - do 5 sati
- primjena lokalnih propisa - 20 sati
- *ostale teme prema IES 2/MOS 2-20sati*
- Simpozij -10 sati
- samoobuka - 5 sati
- **Mogući broj sati - 70 sati**

Specijalistički dio kontinuirane profesionalne edukacije se sastoji od:

- pisanje stručnih članaka - do 5 sati
- pisanje stručne knjige - do 10 sati
- koautorstvo - do 5 sati
- *seminari za primjenu IFRS /IAS, (MSFI/MRS),ISA (MSR) , SMES, IPSAS- 30 sati*
- **Mogući broj sati - 50 sati**

Član 6.

Shodno zvanju u računovodstvenoj profesiji, omjer između općeg i specijalističkog dijela kontinuirane profesionalne edukacije može biti:

Zvanje u računovodstvenoj profesiji	Opći dio : Specijalistički dio
-------------------------------------	--------------------------------

- certificirani računovodstveni tehničar	80% : 20% ili 32 sata : 8 sati
- certificirani računovođa	70% : 30% ili 28 sati : 12 sati
- ovlašteni revizor	60% : 40% ili 24 sata : 16 sati

Član 7.

Svako lice iz računovodstvene profesije je slobodno, da samo prema svojim sklonostima bira aktivnosti koje će upražnjavati u toku jedne poslovne godine kako bi ispunio minimum uvjeta (40 sati) kontinuirane profesionalne edukacije u jednoj poslovnoj godini. Član računovodstvene profesije (korisnik zvanja) može birati oblike kontinuirane profesionalne edukacije, priznate od Saveza, na kojima će sudjelovati.

Član 8.

Svaki od certificiranih članova računovodstvene profesije koji je imao obavezu pohađati obaveznu kontinuiranu profesionalnu edukaciju, dužan je istekom svake godine, pri ovjeri licence za narednu godinu osigurati dokaze da je ispunio zakonom propisanu obavezu o kontinuiranoj edukaciji.

Član 9.

Izvođenje kontinuirane profesionalne edukacije će moći obavljati svi potencijalni izvođači nastave koji se obrate Upravnom odboru sa prijedlogom tema koje će se izvoditi na pojedinom seminaru, savjetovanju ili radionici te koje Upravni odbor Saveza prizna kao Program kontinuirane profesionalne edukacije. Svi takvi vidovi kontinuirane profesionalne edukacije će se obavljati uz korištenje imena Saveza uz odgovarajuću naknadu . O visini naknade za korištenje imena Saveza donijet će se posebna odluka Upravnog odbora Saveza. Kod određivanja Simpozija kao vida kontinuirane profesionalne edukacije primjenjuje se isti princip iz stava 1. ovog člana.

Član 10.

Savez će, uz registar o stečenim zvanjima, voditi i podatke o izvršavanju uvjeta kontinuirane profesionalne edukacije za svakog člana.

Član 11.

Troškove kontinuirane profesionalne edukacije snose korisnici zvanja u zavisnosti od forme i trajanja edukacije, a visinu naknade za obnavljanje licenci će utvrditi Upravni odbor Savez posebnom odlukom.

Član 12.

Ovaj Pravilnik stupa na snagu od dana kada ga prihvati **Komisija za računovodstvo i reviziju Bosne i Hercegovine** i primjenjuje se od 01.1.2006 godine, a izmijenjene odredbe člana 5. od 1.1.2007. godine. Ova će pravila biti objavljena na web stranici Saveza i u stručnim časopisima članica Saveza.

Član 13.

Tumačenje odredaba ovog Pravilnika daje Upravni odbor Saveza, a njegove izmjene i dopune vrše se na isti način kako je i donesen.